

## Raadslid van de maand

Gerrit Vossers  
(bi'jnao 51)  
Raadslid Lokaal Belang

Aover twee dagen is Gerrit jeurig. Zeker wetten dat volle lu'j um wilt feliciteren: niet alleen as weerman ("n uut de hand gelopen hobby") is hi'j un bekende Achterhoeker, maor ok as volksvertegenwoordiger.

### Achtergrond:

Hi'j het zo'n 90 stuks jonkvee te verzörgen en hi'j arbeit as zzp'er in de landbouw. Zat al jong in besturen van landbouworganisaties. Is van begins af aan in Olde Iesselstreek raadslid en daorveur al as fractieassistent, alles bi'j mekare zo'n 17 jaor. Toendertieds wetholder Johan Hemink vroeg um as liestduwer bi'j Gemeente Belangen Wisch. "In de gemeentepolitiek ku'j mensen helpen en d'r veur zörgen dat er ok gepraot wudt met die lu'j aover wie het geet". Is kerkrentmeester van de PG kerk in Silvolde.

### Waor gewoond

Altied in Silvolde op de Lichtenberg: eerst met zien ouders en vanaf midden jaoren '80 met Everdien en hun kinder Thijs (20), Vera (18) en Sjoerd (17). Met weerstation Lichtenberg is Gerrit 25 jaor gelei'jen begonnen. "Daor bun'k vanaf de vrogge morgen elke dag wel un uurken of vier met bezig, o.a. veur Optimaal FM en Focuz TV.

### Betekenisvol moment in het politieke leaven

"Het afmaken van gezond vee toen d'r in 2001 mond- en klauwzeer was, dat von'k rigoreus. De aoverheid grip dan wel erg hard in bi'j bedrieven. Ik vond dat dat zorgvuldiger kon".

### Media:

Zög zich meestentieds informatie op op het internet. Wieter op zaoterdays de Gelderlander en vakbladen as De Boerderij. Luustert op de trekker en in de auto naor de lokale radio. "En met 'Gute Nacht Freunde' gao'k slaopen."

### Muziek:

Spölda vrogger trekzak en is groot eworden met Normaal, vanaf het feesten bi'j het vroggere Wildenbeest in Doetinchem. "Ik bun maor 'n eenvoudige boerenlul 😊. Mien zie'j niet snel op 't bordes, liever tussen de mensen. Bescheidenheid duurt 't langst".



**"Het wudt aoveral drukker, maor ik bun 'n echte plattelandsjongen. Op mien eigen plek vuul ik mien op mien gemak. 'N dagje uut is mooi maor daornao lig ik weer graag in mien eigen bed.**

### ⇒ Wat is ow driefveer veur Olde Iesselstreek?

"Olde Iesselstreek blif van zich eiges redeluk te aoverzien, 't is geen stad met uitbreidingsdrift. As i'j maor de aantrekkelijkheid van de openbare ruimte in stand holt. De leafbaorheid steet of vult daormet. Onze gemeenschap hef volle vri'jwilligers, as gemeente mo'j dat steunen. En de schrieveri'j minder maken zo-as dat met de evenementenvergunningen gedaon is. Ok 't kappen van bomen is now 'n pluspunt: as 't beeldbepalend is met vergunning en anders alleen 'n melding doen. Wieters mot wi'j erveur zörgen dat veurzieningen zo-as de muziekschool overend blieft. Muziek maken is ok belangriek veur ow algemene ontwikkeling en sowieso positief want dan he'j meer gevuul veur dansen en dan kom i'j makkelijker an 'n partner 😊!

**"Raodswerk is vaak onzichtbaor"**

### ⇒ Wanneer is ow raodperiode geslaagd?

"Deur bi'j te dragen an dat er iets veurmekare kump. Vake zie'j dat soort werk van 'n raadslid niet. Maor i'j doet 't wel omdat i'j as volksvertenwoordiger dicht bi'j de lu'j staot. Ik heb mien heavig druk gemaakt veur 'n goedkopere afvalinzameling en -verwerking. Of nem now die ni'je windmöllens bi'j Netterden.

Zo'n traject duurt vake erg lang en de techniek hölt ow telkensmaole in maor i'j zult wel es 'n stap motten nemmen. Op vergaderingen en evenementen, van veurlichtingsaovonden tot kermis, van Huntenpop tot de Zwatte Cross wodt ik deur volle lu'j an esprokken. Zekers wel 40 verschillende per maand en 'n kwat van die praoteri'je geet aover politieke vraogen. As raadslid kan'k dan tips geven aover hoe iets lup op ut gemeentehuus. Dan hol i'j de lijnen köt en daor hol ik van in het raodswerk".

### ⇒ Hoe zie'j de toekomst van de gemeente?

Met heel völle toeristen denk ik! Wi'j hebt now eigenluk alles al: 'n mooi platteland, 'n rustige omgeving, völle cultuurhistorische dingen en allerhande grotere en kleinere activiteiten. Olde Iesselstreek mot dat totale pakket wel beater aanbieden, zo-as now deur de VVV's en met Hap en Trap arrangementen al gedaon wudt. 't Weerstation is ok steeds vaker 'n vertrekpunt veur 'n dagje Achterhoek merk ik. Iets anders wat veur de jongelu'j belangriek is is da'j gemakkeluk met de trein hen en weerumme könt naor Arnhem en Nijmegen. En veur lu'j zonder auto, meestentieds olderen, moj de buslijnen in stand hollen".

### Contact:

✉ [g.vossers@oude-ijsselstreek.nl](mailto:g.vossers@oude-ijsselstreek.nl)

🐦 @GerritVossers

📻 Luuster naor dit raadslid op de radio, met as gasten Johan Westerveld (kampeerboerderi'j De Küper) en Inge in het Veld (woont in Sillevold en hölt zich bezig met afval). Optimaal FM, zondag 27 oktober om 12:00 uur: ether 94,7 / kabel 105,4.

### ⇒ Vraag van uut de markt

**Waorumme eigenluk schrif Lokaal Belang achter zien naam de letters GVS?**

**Gerrit Vossers:** "Dat steet veur Gerrit Vossers Sillevold... maor zonder gekheid: die verwiest naor het samengaan van de lokale parti'jen uut Gendringen, Vasseveld en Sillevold. Onze leden stelt dit altied nog op pries maor in de praktijk zun wi'j al lange niet meer dri'j groepen. In tien jaor tieds zunt wi'j naor mekare toe egreujd en echt één blok veur de hele gemeente".

### ⇒ Estafettevraag:

**Mia Verwaaijen was het veurige raadslid van de maand en vrug an Gerrit Vossers:**

**"Wat is verandelukker, de mening van 'n politicus of het weer?"**

**Antwoord:** "Wat mien angeet is het weer verandelukker. 'N bu'j kun an zien kommen, maor hi'j kan d'r ok net neaven vallen. In de politiek waej ik niet zomaor met alle winden met. As ik ergens veur stao dan zet ik mien d'r helemaol veur in. Al kan'k overtuugd raken van 'n andere mening as den goed onderbouwd is".

En de vraag den Gerrit Vossers wieter gif an het volgende raadslid van de maand is:

**"Sluut de politiek genog an op hoe de lu'j dagelijks leaft?"**

### ⇒ Gerrit Vossers:

**"Lief zun veur de earde"**

"Bi'j Lokaal Belang bemuuj ik mien met de openbare ruimte. Ik bun völle buuten en heur dan meestentieds wel wat de lu'j van de buitendienst bezig holt. Het is goed dat de gemeente milieubewust bezig is. Onkruid wödt in de toekomst zovölle meugeluk weg ebösteld. Ok vanuut mien geleuf vin'k 't belangriek um de earde un betje'n te koesteren. Maor nee, niet zoas bi'jveurbeeld de Partij van de Dieren dat dut, ok al bunt ze, politiek gezien heel slim bezig... Landeluk stem ik altied 'n betjen rechts van 't midden, CDA of VVD".

[Foto: Lieneke van Tilburg]

